

Augsburg, 13. März 1565

An Joachim Camerarius d. Ä.

BSB, Clm 10370, Nr. 292 (nicht eigenhändig bis auf die Adresse und den Schluss).

Clarissimo viro, D. Ioachimo Camerario etc. Domino et amico suo colendo. Leipzig.  
 S. D. Mercurium per aliquot menses malè propicium expertus (duo enim Basilienses tabellarij eodem anno mihi perierunt, et alij negligentius solito, literas meas curarunt) vereor ne epistolia mea complura, ad te data, interciderint. Quae iactura, etsi per se nullius momenti est (nihil enim rei grauioris continebant) tamen illud permoleustum mihi accideret, si aliena culpa in suspicionem tibi venirem negligentiae, cui, vt viro et amicissimo et clarissimo, cumprimis officium meum cupio probari, atque etiam spero, quae tua est singularis humanitas, et intelligentia earum rerum, quas fortuna solet nobis, qui peculiares tabellarios non alimus, obijcere. Sed vt ad rem veniam, gratas tibi fuisse graecas chartas, quas misi, ita iucundum mihi est, vt me tibi debere eo nomine putem, tantum abest, vt leuidense munusculum uel quadrante pensari cupiam, imò (si verum fatendum est,) veritus sum, ne μικρολογώτερον τοῦ δέοντος me putares. Verum libellis tam bonis, non reperiri typographum, non tam miror, quām molestē fero. Sed si Oporinus incolumis est, et non ad restim redactus (quod absit) haud inuitus tibi nauabit operam, modò conuersio tua cum graecis coniungatur, quae sola, his temporibus toto impetu ad pristinam barbariem ruentibus, perpaucos inueniunt emptores, lectores verò longè pauciores. Noui quod scribam nihil habeo, nisi quōd superioribus diebus codices aliquot graecos manuscripts, qui è Theodosiana Byzantij Bibliotheca huc perlati ferebantur, Senatus nostri iussu comparaui, quorum catalogum tibi ἐν τοῖς μάλιστα φιλέλληνι ὄντι,<sup>1</sup> quia non iniucundum fore puto, subiectendum curaui. Vale. Augustae Vindelicorum. 3 Idus Martij. 1565.

Pselli Dioptra, id est, perspectiua, opus Theologicum et historicum.

D. Chrysostomi sermones, qui statuae inscribuntur, et alia.<sup>2</sup>

Codex complures synodos, et Ecclesiasticas constitutiones, et iuridica quaedam continens.

Noni Medicum opus, cum quo coniunctus est Simeon Sethi, et Actuarius de Vrinis.

Methodius in Apocalypsin.

Eustathij libri vndecim, de Hysmine et Hysminia.

Chrysostomi epistolae ad Olympiadem, et alia quaedam.

Chronicon Ioannis Glycae, ab exordio mundi, usque ad Calo Ioannem Comnenum. Theologicum<sup>3</sup> et physicum opus non minus, quām historicum.

Barlaami narratio de interiore Aethiopia seu India.

Damascenus de haeresibus, et alia quaedam.

Theodoreetus in centum quinquaginta Psalmos.

Theodori Metochitae capita Philosophica et historica, centum viginti.

Procli libri quatuor, de Theologia Platonis.

Chrysostomi enarratio in epistolam ad Thessalonicenses, Timotheum, Titum, Philemonem, Hebraeos. Eiusdem epistolae 7 de legibus naturae. Et Clemens de Petri praedicationibus, et Martyrium Clementis. Et D. Ephraim Chersonis archiepiscopus de Miraculo Clementis. Et Martyrium S. Blasij.

Chrysostomi in epistolam ad Romanos, sermones quadraginta.

Libanij Rhetoris, plurimae orationes et declamationes.

Opus contra Barlaamum et Acindynum de diuina gratia.

Nemesius de natura hominis. Et Procli institutio physica. Et Ptolemaei opera Astronomica, cum Theonis commentarijs, quanquam in fine mutilis. Vetustissimus codex et elegantissimè scriptus.<sup>4</sup>

Hermogenes de inuentione cum commentarijs.

Harmonica Ptolemaei.

Glycae explicatio obscurorum locorum sacrae scripturae.

Syngeli<sup>5</sup> Historiae, ab exordio mundi, vsque ad Heraclonam, Heraclij F[ilium].

Dauid philosophus in quinque Porphyrij voces, et Categorias Aristotelis.

Idem in Logica Aristotelis.

Aristidis Quintiliani Musica.

Pedasimus de dimensione terrae.

~~Diadochi Photiees Epi Episcopi, capita illuminantia.~~

D. Athanasij quaestiones obscurorum locorum sacrae scripturae.<sup>6</sup>

Palaeologi imperatoris admonitiones ad filium.

Quaestiones propositae Caesario, Gregorij Theologi fratri.

Theophylacti Bulgariae Archiepiscopi enarratio duodecim prophetarum.

Constantini imperatoris opus de apparatu bellico.

Nuper<sup>7</sup> ferebatur filius tuus D. Ioachimus D. Hessi viduam duxisse. Quam affinitatem vobis felicem et faustum esse opto. Ego accinctus sum itineri in Thermas Ferinas, non tam recreandae valetudinis spe, quae a diaeta magis pendet, atque à vino potius maturo καὶ

ἀφαρμακεύτω, quām ab aquis medicatis, quam acquiescendi nonnihil studio, et conspectum earum rerum, quas nec sine dolore video, et quotidie videre cogor, saltem ad breue tempus vitandi cupiditate. Iterum vale.

Hiero[nymus] Wolfius  
Tuus.

<sup>1</sup>οὐτι] von Wolf eigenhändig ergänzt // <sup>2</sup>aliae Hs. // <sup>3</sup>Theologicum] Theologum Hs., von Wolf korrigiert // <sup>4</sup>Vetustissimus ... scriptus] von Wolf eigenhändig ergänzt // <sup>5</sup>Syngeli] von fremder Hand (Camerarius?) am Rand korrigiert: Syncelli // <sup>6</sup>D. Athanasij ... scripturae] von Wolf eigenhändig am Rand korrigiert // <sup>7</sup>Nuper] von hier ab bis zum Schluss von Wolf eigenhändig geschrieben.